



Ilis confamiliars digl actur Beat Marti ein era presents: Theres, Ruedi, Beat Marti e Barbara Grundmann (da sen.).



Il tat Lucas Jacomet (amiez) ha plascher da siu biadi Bono che gioga il feagl da Gieri (Bruno Cathomas).



Tonia Maria Zindel cun feagl Men e Murali Perumal, acturs principals el film, s'entaupan cuns producents dil film «Acta 44» Fabio Tuor (sen.) e Flavian Bearth (dretg).



Fatschas impurtontas davos la culissa dil film: regissur Christoph Schaub e sia dunna Christine, scenarista Sabine Pochhammer (amiez).



Actur René Schnoz e Sep Benedetg Candinas, patron d'«Amarenda».



Il bab ed ils frars da Murielle Degonda ein spanegiai co ella seprenta el film sco Peppina.

FOTOS P. DUFF

## Grond interess per il film romontsch

«Amur senza fin», la premiera a Sagogn

DA PAUL DUFF / ANR

■ La sonda vargada eis ei stau aschi lunsch. Il niev film romontsch «Amur senza fin» ha giu premiera a Sagogn. Leu el liug da sia provegnientscha ein ils acturs serimnai per mirar il resultat da lur lavur. Cun els ein lur amitgs, ils fautors e biars interessents dalla cultura e dil lungatg romontsch stai presents.

### En rama familiara

Per 20 onns Kino Sagogn ha l'uniun culturala Pro Sagogn retschiert la premiera dil film romontsch. Ina tenda ha dau suost als envidai e hosps ed «A marena» ha surviu in aperitiv enrihius cun bunas specialitads grischunas. En ina atmosfera familiara ein ils gidonters ed ils statistis dil film serimnai e plaun a plaun ein ils stars principals arrivai e semischedai culs presents. Ils pli renomai ein sedai giu cun Gion e Martin a moda simpatica. «Nus havein giu quell'atmosfera amicabla gia durent ils dis da filmar», di ina dunna ch'ei stada siat dis sil plaz per cumparer el film davostier bunamein sco culissa. Biaras fatschas ch'ei buca da veser el film, mo ein stadas involvidas ella lavur durent ed avon filmar, plirs dad els ein sedai d'enconuscher. Ils pli renomai ein Sabine Pochhammer, l'autura dalla historia. El medem context stat Leo Tuor ch'ha mess en romontsch il text ed era Mario Pacchioli ch'ha scolau pronunzia ed articulaziun als acturs ch'ei buca da lieunga romontscha. Gronda lavur durent il filmar han il regissur Christoph Schaub, igl



Mariano Tschuor, iniziant e promotur dil film, reparta engraziament sin tuts mauns.

um dalla camera Pierre Mennel ni era Angelica Götz, la cusunza dils costumes, giu. Mariano Tschuor, igl iniziant, la fontauna dall'idea ed il motor ch'ha muentau dagl'inizio tochen tier la realisaziun, el ha ussa d'engraziar a tuts participonts. «Il lungatg romontsch ha stuiu s'emancipar en caussa amur e carezia.» Il vocabulari ei carschius per entginas expressiuns da quell'acziun denter humans. Gilles Marchand, il directur general dalla Societad SRG, ha ludau la lavur e numnau sco fundament la convivenza dalla Svizra sco nazium da voluntad. La SRG dat sustegn a quella bunaveglia vivida ed el fa in ple-doyer sin tala prestaziun sociala.

### Il film

La premiera ha gia ordavon giu ina gronda interessenza, perquei ein duas produzioni stadas sin program. L'acziun dil film setracta dil viver ella societad, en famiglia, il fiug d'amur che stezza suenter vegn onns lètg e la stentas dad envidar puspei la flomma. Il regls vegnan cuschentai ord casa e caschunan scumbegls e trumpadas. Mona (Rebecca Indermaur), Carla (Marietta Jemmi) e Ladina (Anita Iselin) prendan cussegl dil plevon Nandra Sharma (Murali Perumal) co carmalar lur umens en letg. Giulia (Tonia Maria Zindel) ha in'affera cun Gieri (Bruno Cathomas), il mariu da sia amitga Mona. Siu um Urs (Beat Marti) ei seprofundaus ella lavur ed el sport. Il plevon che deriva dall'India ha spert cattaui las ragischs dalla marschauna. «Pertgei tschintscheis buc in cun l'auter sur dils problems?» Negin ha ina risposta sin la damonda, denton ei quella il fundament per la nov'entschatta. Las fermas rollas dallas dunnas muentan la scena, ils umens ein plitost en fasa reactiva. Sulet tier la catscha sin capricorns vulan els giugar la rolla principala.

Il film cuntegn pliras scenas cumediantas. Il publicum ei sedivertius. Las reacziuns suenter la presentaziun ein stadas positivs. Divertent, divertent, legher, quellas expressiuns ein curdadas il pli savens. Mia remarca provoconta «scandalus» ha negin attestau, schegie ch'il film muossa aviartamein ils maletgs da «kamasutra».

Il film «Amur senza fin» vegn mussaus el program da DRS1 ils 23 da settember.



Tuts protagonistis e la crew dil film seprentan sin tribuna a Sagogn.